

Dia 28 di Juni proximo na Curacao..

THE CREATORS LO PRESENTA DURANTE "SOUND OF COLOR MUSIC FESTIVAL '98"..

DEN AMBIENTE



**** Aki por aprecia Swinda Stamper durante entrevista na Cristal Fm, den e programa "Show di Poets"..**

**** "THE CREATORS"**, Aruba su orguyo banda di reggae, lo representa Aruba na Curacao durante e grandioso "Sound of Color Music Festival '98".

Recientemente e organizadora di e festival aki

kende ta Swinda Stamper, tabata na Aruba y a realiza un entrevista cu DEN AMBIENTE na Cristal Fm durante e programa "Show di Poets" di tur diasabra. Durante e entrevista aki Swinda Stamper a confirma e presentacion di "The Creators" y

alaves a relata e programa di "Sound of Color Music Festival '98".

Caribbean Pearl ta un organisacion bao di su maneho como directrice y ta consisti di un comishon di cinco persona. Meta di e organisacion aki ta pa promove turismo en particular y atraccionnan riba nivel internacional.

E grandioso evenemento "Sound of Color Music Festival '98", lo ta durante un siman largo di diferente actividadnan presidiendo e concierto. E concierto aki lo ta un "Reggae Sound Splash" cu un invitado special cual lo ta e agrupacion di mucha muher cantando nan hitnan di e musica R&B and Soul, cual lo ta e grupo "CHANGING FACES".

E evenemento aki ta tumando lugar pa varios aña caba na Jamaica. Tambe lo tin diferente "Tour Packages" di hotel na Curacao, na tarifanan masha atractivo. E booking por wordo haci na Arutravel aki na Aruba. Na momento cu e booking wordo hasi, automaticamente

lo reserva e caarchi di entrada di e concierto tambe na Curacao.

E grandioso "Sound of Color Music Festival '98", ta ranca sali dia 23 di Juni proximo cu un tremendo "Sound of Color Jump-Up". E jump up aki lo tuma lugar den cayanan di Curacao, tur participante lo jump y balia riba e musica di Gio Fuertisimo y Rizam.

Dia 24 di Juni, lo bay tin e "Sound of Color Barthender Contest", cual lo ser organisa pa Curacao Barthender Association. E cocktail mix drink ganador lo hiba e number di "Sound of Color Mix Drink '98".

25 di Juni, lo tuma lugar "Sound of Color Bon Bini Happy Hour, patras di seccion di Cultura na Skarloo, na unda lo bay tin presentacionnan di diferente grupo di baile y tambe agrupacionnan local manera Goldy Locks, Chupa Bebe Band y Dj Renzo. Tambe lo tin stands di cuminda y obra di man.

Mientras cu 26, 27 y 28 di Juni, lo ta e dianan di e

concierto di reggae hunto cu e grupo invita di R&B/Soul "Changing Faces" for di New York. Durante e tres dianan di e concierto, 7 artista di reggae hopi conoci den mundo di farandula lo pone nan musica zona. E artistanan invita internacionalmente lo ta: Bunny Whaler, Gregory Isaac, Cocoa Tea, Psalm Tucker, Shaddon Tucker, Marsha Griffith y Changing Faces. Hunto cu e agrupacionnan aki lo viaha un grupo di baile for di Jamaica pa duna nan presentacion den e concierto aki. Di Curacao lo duna nan presentacion: Goldy Locks y e banda Leksus. Tambe for di Boneiro lo duna nan presentacion e banda Equal Right Justice y Dj Music King kende porcierto actualmente ta grabando su di 10 cassette di reggae roots. "THE CREATORS" lo representa Aruba y nan ta programa pa e ultimo anochi di e evento dia 28 di Juni. No tin duda cu "The Creators" lo bay "steal the show" cu nan estilo unico di caliber halto..



**** Esaki ta e integrante nan di nos tremendo banda di reggae "THE CREATORS": Anthony Hoeverstsz (guitar), Nico Conner (bass guitar/vocals), Steve Gibbs (trombone/chorus), Rene Lacle (keyboards/vocals), Ruben Trappenberg (lead vocals), Lucio Rivadeneira (soprano sax/chorus) y Carlos Jacobs (drums/band manager). Falta riba foto: Ajoen Chung (percussions) y Eric Arrendell (tenor sax/chorus).**